شاعر بلاد النيل أشعار بالعامية المصرية الطبعة الأولى 2018



بطاقة الكتاب

عنوان المؤلَّف : كتابين التاريخ

المؤلّف : أحمد حلمى احمد

التصنيف : أشعار بالعامية المصرية

رقم الإيداع : 13794-2018

عدد الصفحات : 100 صفحة

رقم الإصدار الداخلى: 212 الطبعة الأولى 2018

تصميم الغلاف والتنسيق: دار النيل والفرات للنشر والتوزيع

جميع حقوق الطبع والنشر محفوظة للشاعر، ولا يحق لأى دار نشر طبع ونشر وتوزيع الكتاب الا بموافقة كتابية وموثقة من الشاعر



الشاعر في سطور



المعلومات الشخصية:

احمد حلمى احمد مىيلاد مىن مواليد القاهرة فى 1988/11/20 بحسى دار السكلام حاصل على بكالوريوس تكنولوجيا الانشاءات المدنية عن جامعة بنسى سويف عام 2010 و يعمل بالمجال الهندسى متزوج وله ولد وبنت.

الالقاب والجوائز السابقة:

شاعر جامعة بنى سويف 4سنوات متتالية وحاصل على لقب الجامعات 2008 فى شعر العامية المصرية بمعسكر ابو بكر الصديق بالاسكندرية والحصول على لقب شاعر بلاد النيل بالمسابقة حاصل على لقب شاعر النيل والفرات لحصولة على المركز الثالث مكرر بمسابقة شاعر واديب النيل والفرات من دار النيل والفرات للنشر والتوزيع تم تكريمة بالعديد من الصالونات الادبية المختلفة تم تكريمة من التجمع العربي للثقافة والابداع ومن فريق بكرة احلى لرعاية المواهب والفنون لدوره الرائد في المجال الادبي والثقافي عضو مؤسس بنادى ادب وادى النطرون (تحت التاسيس) وتم تكريمة من جامعة بنى سويف لدوره الفعال لاثراء الحركه الثقافية بالجامعة وتم تكريمة من كلية التعليم الصناعي ايضا بجامعة بنى سويف المصرى للشعر العامي عضو هيئة التحرير بمجلة مبدعو مصر تم نشر العديد من اعمالة بالجرائد والمجلات الالكترونية المختلفة .

الاعمال السابقة:

ديوان ورقى بعنوان (جدران الماضى) له عشر دواوين الكترونية واغنية

مختلفة تم اذاعة بعض الاغاني له براديو مصربصوت المطرب شادى رمضان نجم فرقة التخت العربى بدار الاوبرا المصرية شارك فى تاليف ثلاث مسرحيات (رغم الاختلاف – ورقة وقلم – الفيلسوف) له اوبريت غنائى بعنوان رغم الاختلاف

المقدمة

بسم الله الذى اعزنا بفضله والحمد لله الذى جعل اقلامنا عونا لنا ضد اعباء الحياة والصلاة والسلام على خاتم الانبياء محمدا رسول الله صلى الله عليه وسلم

شاعر بلاد النيل / احمد حلمي احمد

دیوانی (کتابین التاریخ)

ما هو الا مشاعر ترجمت على ورق

الإهداء

الى شهداء الميدان
الى البسطاء
الى البسطاء
الى امى الى الكادحين
الى امى الى ابى الى اخوتى
الى اولادى الى زوجتى الغالية
والى من فرق بيننا الزمن فى وقت ما ,
الى اهلى الى احبابى الى اصدقائى
والى من سيخلد اسمائهم فى ذاكرتى حتى يوم مماتى
والى مشرفه - سيد حجاب - طه حسين على مصطفى مشرفه - سيد درويش - ناجى عبد المنعم محمد عبد الوهاب - صديقة الطفولة ام كلثوم - محبوبتى
فيروز والقائمة تطول)

بتمعشقك

الصبح فاتح للامل دراعات والشمس رافضه للضلال الكسر والصبر كان صحبه معاه بنبات شادد في توبنا ننجده م الاسر حالف لاحبك لاخر الدقات لحد ما يبان للظلام الفجر واملك بحبك نجمة م السموات واشوف بنورك كل ليل البدر ولا حاجه توصف قلبك الفياض ولا شئ بيوجع قد ساعة الهجر يبقى حبيبتي اوعي انك تهجريني

او يوم ادوق قسوتك و الصبر عارفاني اني ما اهيب الموت لكن اهيب ان احنا نبقى ببعد املى بساتين المحبة هو الوانك وعطرى كل الورود من عطر بستانك ازاى احبك والعيون تلمح عيون غيرك ده مفيش عيون قابلتك الا و تفتانك والصبح فاتح للامل نورك والشمس تتمعشقك وبيكي تتبارك انا اللي لو سيبتك بعدك هكون هالك علمتى قلبي العشق كما طفل بدراستة حافظك وبيرددك وانتى ب كراستة ويقوم يعيد ويزيد فيكى يا محروستة فاهمك وحافظك صم وبقلبي محبوبة

كتابين التاريخ

ولغيرك انتى أصم وعيونى معصوبة انتى اللى راح والجاى وعليا مكتوبة وان بعدك نويت العشق العشق بعدك توبة وانا زيى زى الشمس عاشقك وبتمعشقك لو كان محاوطك سور لابد انى اسرقك دانا قلبى بعدك يبور لو مش هكون ليكى لو كنتى وسط النار هروح هناك اسبقك بتمعشقك

البلكونة

قاعدة عصارى وفنجان من القهوة عصفور كنارى فی ضهری بیزقزق على سهوة شعاع من الشمس داخل بس باستحیاء بدون دعوة ولبلابة تضللني وقصريه ريحان فواحة مع رشفه من القهوة

وصوت الست

طالعلى من التسجيل

اغدا القاك ؟! فقلبي يميل

مانیش عارف هل فی یوم هیکون ؟!

منا دایما بحس غناها ده لیا !!

تقول مجنون

فى يوم غنتلى وحكتلى

على اللي في قلبها مكنون

بصوتها العذب على ليله

اتمنت انها تكون

لكن ليله مكفتهاش

فكانت الف ليلة و ليلة

نفسها تتعاش

فكنت طفل حب

الست من صوتها یکون لیها یا اما بلاش وبصیت مرة من سورها لقیته معدی قدامی بلا ترکیز

ده عم عزيز ؟! وعم عزيز راجل جارنا فى حب الخيرميتاخرش حكاية حكاية الراجل ده ملوش اولاد ولا احفاد شوية ميه مع لقمه تكون ليه زاد

> وحب الناس اعز ما يملك فكان عزوة بلا اولاد مثال للزهد والعفة

ولما كبرت وخادتني الحياة لفة

رجعت اسال عليه قالولى مات حنين لطفولتي لما لمحت بلكونتي ما هی مش فی عینی زی ای بلکونة كانت شباك لاحلامي کانت ملاذی ومهرب*ی* من عتمه ایامی كانت جنه في وسط الضيق كانت في الضلمة ليا طريق كانت في حياتي كما ميه تبل الريق وكانت غالية ومصونة البلكونة

آنات

آنات من عشقك آنات في عيونك انا بلقى كياني وفي حبك إثبات الذات آنات في وجعها بتريح وبتطير م الفرحه أوقات آنات بمطارحي اما اتغرب واشتاق لرجوعي اني ابات آنات فی هواکی ع مراحل ابقالك ولا اكون راحل ولا انسى بيوم شوقى لقلبك وساعتها يكون قلبى مات

آنات من عشقك آنات آنات مرسومه ع حيطاني صورة لفراقى لغاليين وصورة وانا لسه بعانى آنات مدفونه جوايا عن قرب احبابي منعاني آنات بتفكرني بجدى لما طبطبلي على اكتافي آنات لعيونه اما واجهنى وقالى كلك اوصافى آنات من الدنيا الهدامة لما بتفرق الاخوات آنات من الدنيا آنات بهمومها بنصحى وبنبات

آنات بوشوش المساكين وآنات في قوافي الابيات آنات من قلمي اما اتوجع لما خطيت بيه المر آنات من عيني اما تدمع وشريط الذكري بيمر في قلوب الناس ياما آنات بتستني التكه انها تطلع لكن بتفضفض بسكات

كتابين التاريخ

يا كتابين التاريخ يالا اكتبوا عارنا ضربوا فينا المثل وعابوا على دارنا والدورع الساكتين واحنا حطب نارنا مهما يطول المطال هينشفوا انهارنا يا كتابين التاريخ متكتبوش اسمى نبحت صوتى صريخ ولا حد شاف رسمی

الكلب مد البوز ونجس الطاهرين وبقيوا وسط الوحل بعيد عن السامعين يا كتابين التاريخ مين اللي باقى لمين كفه ميزان العدل مالت على الجنبين والحق تاه بينهم جاهل طريقه منين يا كتابين التاريخ متكتبوش همين هم الوطن والاهل وهم اسمه حنين

كتابين التاريخ

يا كتابين التاريخ بقى كله ع المكشوف مين اللي باع الارض ومين اللى صان معروف ومين اللى عاثها فساد وربى فينا الخوف يا كتابين التاريخ صابنا العمى ولا زاد الفساد فينا والعدل راح ولى لو حكمنا لخاينين ایه تانی یتخلی يا كتابين التاريخ كيلنا طفح والله

القديس

اذان اجراس زاویة دیر خطبة قداس وبخلصلك و حبیتك كما راهب بعمه فوق الراس كما القدیس فی محرابك وزی منادی فوق مدناكی

ولو طالت سنين سفرى فانا راجع ومالى قبله الاكي عشقك لقلبي المبتغي حنین مشدود علی اوتاری انا حيطه سد لمن بغي فلا تخافي ولا من بكره تحتاري شهیدك لما تتمنى فى يوم دمى وبرده هداكي لما تخافي وتسمي فمش خایف دمی یتبعتر منا عارفك بايدك برده هتلمي انا جدر سارح جوه ارضك الطاهرة وانا نخل طارح من سنين غابرة وانا ريحه زاكية جوه بستانك ع الزَهرة وإنا دمعة بتحن لماضيكي لكن عابرة انا حزن ام ع الشهيد لكنها صابرة انا القديس انا العابث في تاريخك

انا اللي ضد كل وريث انا الثائر كما ريحك انا اللي عليكي بس حريص انا الجمهور وانا اللي بقيم المسرح و انا الجالس ورا الكواليس انا الخاين لكل من خانك وانا اللي بهد في الفاسد انا هلالك وانا صليبك وعشقى ليكى دين واحد انا القديس عشان ابنك انا العاشق ومش جاحد

كتابين التاريخ

نوبه

لملم الاحزان وخطى واوعى تجزع او تلين واوعى يوم راسك توطى خلی عصبك یاد متین دانتا نوبی عرق حامی جدر ناشف وسط طین احمی ای حبیب تحبه زی لیث حارس عرین فينا طيبه تفوق بلاد واحنا ارض الشقيانين نوبه كيف ارض الميعاد ارض دافیه بالحنین

ارض بتشدك تزورها سحر یفتن کل عین چَدی یاما حکالی عنها قالى فيها عاش سنين قالى كيف كانت بتقسى وقالى كيف كانت تلين نوبه ام احنا ولادها مین بینسی امه مین نوبه تجرى في العروق نوبه ديه طريقها الوتين نوبه غنوه بصوت منيب حنين بكلمة مشتاقيين نوبه مهما بعدنا عنها ياكلنا في قلوبنا الحنين

كتابين التاريخ

<u>صورة</u>

حنيت اليكي والحنين قساى وكنت فاكر في عشقك بقيت نساي عشت السنين مخبى خایف اعیدها کرة خايف ادوق الوجع من ای عشق جای زاد الحنين لذكرى کانت فی درج مکتبی وفى وسط كومه من الصور صورتك لقيتها مركبي

مركب خادتنى وسط

بحرالذكريات

صورة واحدة

صورة واحدة بس

باقيه من حكايتك

صوره كانت بسمتك فيها

مرايتك

واللى واقف فى المراية

كان انا

عدت يومين كنت فاكر

انهم لسه يومين

لكن صدمت بانهم ٢ اسنة

زاد حنينى لما شوفتك

واترسم قدام عنيا

شريط طويل من الصور لما افتكرتك وكل حاجه عيشنا فيها امتى اتقابلنا ؟!! وكنتى حتى في اللقا لابسه ایه !! وايدك اللي بترتعش!! وسؤالى ليكى !! خايفه ليه؟!! ردك صدمنى وقتها مش خايفه منك لكن مليش في الدنيا غيرك اخاف عليه

دمعه نزلت غصب عنى

والشريط عمال يمر
كنت ليكى وكنتى ليا
و الفراق ملهوش مفر
لسه ايدى ماسكة صورتك
لسه فاكر حتى غيرتك
هيه صورة الباقية منك
نفسى اعرف ايه
اللى باقى منى عندك
صوره واحده ؟!

كتابين التاريخ

سبع بلاطات

سبع بلاطات وشارعنا القديم دكان بركات وصوت عبد الحليم وغنوه حافظينها بالغلط جدعنه وشهامه مافيهاش لبط مصر القديمة وكورنيشها ايام وكنا بنعيشها وشيخ جليل اخد سجادة يفرشها و ضحكه طفل ويا قطة ينكشها وامى وخالتي والجيرة

ونخوه وغيرة على جارتى نخاف على بعض من السيرة ولمه بعد عشوتنا وقاعده وسطحوش بيتنا وذكر الله مع التروايح وزينه ماليا حتتنا وصباره على البلكون وريحانة تعطر جوى وريحتنا زمان یا مصر کنتی جنتنا

مكالمة وهمية

- ـ الو
- **الو**
- سلام لاهل السلام
- علينا وعليك السلام
 - صلاح الدين معايا
 - صلاح الدين معاك
 - انا اخوك عربي
 - تقصد تقول ابنى

اللي اتي بعدي

وكمل الامجاد وعلى و بيبنى

طمنى على الرعية

وايه اخبار الاقصى ؟

وهل صانوا الهدية ؟

و قولى بقيتوا كام ؟

وفیکم کام امام ؟

وقد ايه صارت الامبراطورية ؟!!

ونشرتوا دين الله

على كل البرية ؟

- سامحنی یا جدی

عروبتنا مش سوية

بقينا ميت راية

وكل راية بشكل

نسينا هم الامة

وجرينا نكنز مال

وبطونا شبعت اكل

اقصانا راح مننا

واتغيرت ارضنا بقينا نمشى بركل وامامنا صار دجال ساعى ورا السلطة وعاشق الاموال وايمانا ما يتخير!! واهو برده نفس الحال لكن اتطمن بقينا بنحارب!!

- برده عدو الله ؟
- ودیه برده هتیجی

بنحارب اللي يمجد

او حتى عايز راية

تكون باسم الله

- لا حول ولا قوة يا ابنى غير لله انا كنت اتمنى اكون طامع لسمع الخير لكن نهاية الدنيا بالشكل ده قربت زى ما قالها زمان سيدنا رسول الله

مكالمه وهمية بس بنعيشها لكل طامع فيها فاكر

انه هیورثها

وهتبقى فانيه بيه

او حتى من غيره

رماد والريح في يوم هييجي يكنسها

كتابين التاريخ

تاریخ مغشوش

قالوا التاريخ دايما بيكتبه المنتصر وكل مهزوم بيروح تاريخه بلا اثر وقالوا التاريخ وسط الكتب دايما يكون موجود لكن تاريخنا فيه لغط وحتى اللغط مسنود وكل الاسامى اللي اتحكت واتمجدت اسماء ماليها وجود مره مجدنا في جمال!! ومره حكمنا البغال!! ومره بيبرس!! ومره زغلول!!

و كله بلح معدود ولاريا كانت مجرمة وسكينة مش معلمة مبقتش اصدق ان مينا اسمه مينا ؟! يمكن يكون محمود!! وامنحوتب بيبيع كتب على سور ميدان بالفاطمية ؟! والكاتب المصرى العظيم كان اسمه شربيني او حسن بيرص مقادير البليلة او ممكن تكون مهلبية راجعوا تاریخنا یا بشر دیه بلدنا مش عبده بقر دیه بلادنا ام الدنیا دیه تاريخ مغشوش كلام منقوش على احجار

بنرسم جنة واحنا حدودنا وسط النار وشيلنا الطين من الفاسدين على مر السنين وسنين تاريخ ومبدلينة عاهات وناس غفلت على التزوير وناس قبلت تعيش بسكات وناس بتظلم الاحفاد وكل همومها بس تعيش لا مين عايش ولا مين مات عليكم لعنة وخذيتم ايا عره الاجداد!! تاريخ مغشوش كلام منقوش على احجار بنرسم جنه واحنا حدودنا وسط النار

عداد حنيني

قولیلی کام عداد حنینی وفيه وصلت لحد فين وبتحسبي فيهم انيني ولا ده بيتعد فين والحساب يشمل دموعك لما بالايد شيلتها وبرده يشمل اشتياقي والليالي وعدها وهل بيشمل الوجع من بعدها ؟! و هل بیشمل کل کلمه لجل عينك كتبتها قولیلی کام عداد دموعی وفيه وصلت لكام وليه ؟ وبتحذفي ايام رجوعي

كتابين التاريخ

ولا ديه بتضاف عليه ؟! ولا اشواق الليالى ولا كل ما كنت قرب قلبك انتى لا يبالى !! قولی ای عداد حبتیه ؟ قولى بتحبيني ليه ؟! قولى بتحبى الحنين ؟ ولا بتحبى الدموع ؟! قولى بتحبى البعاد ؟! ولا بتحبى الرجوع ؟ قولى بتحبى العناد ؟! ولا بتحبى الخضوع ؟ قولی ای عداد حبتیه ؟! بس قبل ماتقولی رد قولی بس اختارتی لیه !!

تفاصيل

جوه حياتنا الف حكاية وحكاية وكل حكاية جواها كتير تفاصيل ولو قررنا يوم نحكى بدون اوجاع ولا نشكى ف ای حکایة تحتاج ليها مية تقويل حكاوى كتيرعن الصحبة وبرده حكاوى عن الاخوات وكام قصه عن الاحباب وكام ذكرى عن اللي مات

وكام تفاصيل فى كل حكاية من الحكايات

هنا التفاصيل بتبقى زى خيط مغزول

بيتقاطع ويتجمع ويتشكل ويتلمع

تبان صورته يقوم موصول

خيوط في حياتنا تملاها

بتيجى بحزن اوقات

ومره بفرحه وياها

ولو نربطها هنلاقى

وجودنا هو معناها

ولو مره ذكرنا

اسم من الاسماء

بتيجى صورة تتكون تبان تفاصيل

يجيك من اسم صورة بيت

ومره باسم شكل الغيط واسم بيرسم القهوة واسم بيرسم الدكان واسم القلب ليه يهوى واسم بيذكر الاحزان واسم بيوصف اللمة واسم بيوصف الحرمان واسم تانى تتاذى لذكره بس مهما كان ف بالتفاصيل تبان معالم الحكايات وتتغير علينا الطرق وتفتح بيها الف حوار يا تقفلها بدموع وسكات

كتابين التاريخ

مخدوع

مش عاجز قلبي من بعدك لكنى بعدك موجوع مش قادر اسامحك من قلبي او انی افکر فی رجوع مش قادر اسامحك مش ذنبي او عيني تنزل في دموع ما انا بعدك قوتنى الدنيا والضربه كانت حاجة تانية ما هي ضربه تقوى المخدوع مش قادر اسامحك مش قادر ولا بعدك هبقى المكسور

ولا ههرب من وطنى واغادر ولا هقفل على نفسى بسور ولا اسلم تانى لاشواقك واتعصب واقوم واثور مش هرجع افكر بحنين ولا قلبي يكونلك من تاني لو حتى يكون بعد سنين مش عاجز قلبي من بعدك لكنى بعدك موجوع ولا هقبل من قلبك تانى ولا عمرى هفكرفي رجوع

كتابين التاريخ

حظ ونصيب

قالت بحبك رحت ماشى وسيبتها لازم هنبعد زى اللي فاتت واللى فاتت واللى كانت قبلها ماهى قصة واحدة لكن ناسها بتختلف اصل القلوب بسهولة ممكن تئتلف لكن تكمل للنهاية ده اختلاف وفي حد ذاته مختلف حظ ونصيب انك تكمل فرحتك ماهو مش بايدك تكتب الحب وضمانه طب لو ضمنته هل هتضمن سكتك ؟! حظ ونصيب

مين في يوم يبقى عدوك ومين هيبقي ليك حبيب انك تقرب للى كان منك قريب ولما تبعد لو لثانية فيك يعيب حظ ونصيب انك تآمن غصب عنك للغريب لما سهام الدنيا تطلقها الحياة وسهم واحد فيك يصيب ولما تيجى تشوف ايه اللى صابك تلاقى سهم الغدر كان اقرب نصيب حظ ونصيب

حكاية شاب

في عز شوقه واحتياجه الدنيا ليكي ممنعه ورغم صبره واجتهاده كل السكك متقطعه ما هو كل ذنبه انه حبك وهو شاب ايديه قصيرة وفوق كتافه حمل كيف البردعة وبيعافر واهه معافر وكل معافرته لسراب وحب البعد لجل عيونك الدافية علشانك راح بلاد الاغراب

وداق من كاس عذاب نارك وخطى الشوك ودق ابواب وكل احلامه كونك ليه وعدل الدفه يرجعك وعد العده لوصالك لقى رفضك قصاد منه وانك حتى ولا مره ولو شفقه عليه تحبيه حكايه شاب حب سراب وقال لما هقول حبيت هقولها من دخولي الباب ومین فینا فی حبه مطالش ولا عاند ولا اتكابر وكام حاجة لحبيبه ما قالش

خایف

قرارك خدته من غيرى طب ازای قولی هتقبل خلاص هقفل ع قلبي؟! ومشاعرى ازاى هتتكبل وتسأل هل في يوم بتخاف ؟! طبيعي احس انا بالخوف لكن دلوقتى ملهوش داعى لان العلة خوف مألوف ومفيش ترياق لاوجاعي فسهل انى اقول خايف ونفس الوقت مش واعي لانى خلاص مبقتش اخاف علشان في الاصل انا خايف واخاف من الجهل رغم بجهلي انا عارف وكل نقيض وضده

بس يوصفني ووقت مزاجى بشرب شاى لکن کارف ومرار القهوه معادش خلاص يمتعنى ووجع القلب لما يزيد معادش شئ يرجعني ووقت الهم ماشى كسيح مبيعديش ده حتى البسمه كرهتني وحلفتلي تودعني وروحى الحره كيف ترجع وكل شئ مقيدها ومين للفضفضه يسمع وميتأذاش ويبعدها وقولى ازاى هعيش مرتاح وانا بعدك مسودها فخوفي ده شعور مظبوط لانى بعد ما هويتك لاعيش بيكى لا اما هموت

سكتنا

سكتنا وقصرت سيكتنا ما اختارنا العيشة اللي خدتنا وحلمنا بكل الممنوع روحنا ورجعنا بخيبتنا ضحكت بعقولنا وامانينا ووديتنا بزادنا مكفينا ورجعنا بجوعنا وذلتنا سكتنا وقصرت سيكتنا سكتنا وقولنا استقرار وشقينا ليل ويا نهار لجل ما نكفى لقمتنا

سكتنا وقصرت سكتنا سكتنا علشان القومية وبايدنا علم الوطنية واتارى الوكسة اقتصادية سكتنا وقصرت سكتنا سكتنا وحفرنا قناة وقولنا عليها ١٠٠ الله واتاريها ترعة عالمية سكتنا وقصرت سكتنا سكتنا وصبحنا عليها وقولنا نعلى ونبنيها وهيا بتهد في بيتنا سكتنا وياريت ما سكتنا

كتابين التاريخ

المحراب

ما بين الناس كما الاغراب ملیش فی البرای طریق كما العابد تانسه الوحدة وكتابة ولو دعوه تبل الريق وجيتى انتى قلبتى الكون وفي عيونك صبحت غريق لقيت نظره عنيكي بتشبه الموج الحزين والف معنى مستخبى في دمعتك فبلاش تتوهى وتساليني طريقي فين بصى في عيوني تلاقيني سكتك وبلاش تخافی من قلة كلامی حلو الكلام كتيرلكن مهوش طالع حاجزه غبار السنين والعمر والطالع مهما نخبی الحنين لساه كمان طالع وبتسالينی عندی انتی تكونی ايه ؟! انتی زی السجادة اللی الواحد بيبقی مليان ذنوب ووقت ما اجی اترمی براسی اتوب

انتی اللی من اول ما شوفتك قلبی دق وكنت عایش دنیتی غالب وفیكی بقیت مغلوب

یا میه طاهره فی نبع احلامی یاللی انتی محرابی واعتکافی فیه مطلوب

أنا من ولادك

انا من ولادك یا ارض بایره والحبوب اطنان یا بیت زحام وبالشباب عمران يا صبر شايك وبالورود مليان عصفورى عاجز واعتكف الاغصان والليل طويل لكنه بات بردان

وانا بالمحبه عيشتى فيكى

سنين حياتي

وما اخدت منك غير

اسى وحرمان

انا من ولادك

انا من ولادك بس مش فرحان

اخويا عايش في غربه بس انا

ونسان

عایش غریب علی ارضك

مقفول عليه قضبان

والتهمه انه ثار على حقك

الهربان

كارهه الحبايب ليه؟

كارهه الحبايب ليه؟

وبتعشقى الغربان ملكيش عزيز فيناليه ؟ بتعبدى الاوثان!! ده لما الربيع جاكى كنا احنا برده السبب ولما جاكى الشتا رمتينا في الاركان بتحبسى ابنك وبتعشقي السجان بكره اللي هان ابنك هیهینك انتی كمان فاتا من ولادك بس مش فرحان

بلاد عيبه

فیکی انا اتذلیت ولا كنت يوم قاسى وياما فيكى بكيت وبتحني لي راسي دانتي بلاد عيبه مليانه بالخيبه ولا شوفت فيكى حنان وقت الخطر ضدى وبتقطعي ودى وبتطرديني كمان فیکی انا اتذلیت

ولا كنت يوم قاسى وياما فيكى بكيت وبتحني لي راسي فى مرايتى شوفت الشيب ولا فيكى غير العيب والمر دوقته كاسات بالهم اصحى وابات وانا لسه في شبابي یا بلادی یا ابیه ابقی بقی لیا هتلاقى حضنى اماااان فیکی انا اتذلیت ولا كنت يوم قاسى وياما فيكى بكيت وبتحني لي راسي

اتقى ربك

اتقى ربك يا مؤمن وزيد في ربك بالعشم يوم هيجي عليك هتبكي ويوم هيجي تبتسم واقسم اللقمه ما بينك انتا والغلبان وجود في الكرم احسن في يوم تدور عليك وتتحرم اتقى ربك يا مؤمن اتقى ربك وعاشر بالاصول خلى اللى يقول ويحكى عليك يقول

واوعاك في يوم على حق غيرك يوم تغول اتقى ربك يا مؤمن لانتا عارف اخرتك ولاحتى ضامن لقمتك ولا مأتمن طول سكتك و دايما تصون عشرتك وانشر في ارضه محبتك اتقى ربك يا مؤمن ياللى فاكر فيها انك مقتدر بكره تبقى رماد فى ريح وبس سيرتك تتذكر اتقى ربك يا مؤمن

الكنية ، العنوان ، السن

شكل المغيب على شط نيلك وجع وجع المحبه لطفل محروم الدلع حنين يجر النفس ع الغربة والغربة تربه بتقتل الروح اللي حبت لكن حبك جارى في دمايا وعروقي مهما بتغفى من سنين مسيرك برده هتفوقي وتلملمي وتلملميني وهتعرفي انا اد ایه موجوع و هتعرفی شوقی الكنية شاعر والاصل ولدك عنواني حضنك والبيوت مش حضن الحضن نَفُسك وقت فرح او حزن السن مش م السهل حسبانه ما انا اصلى لو عديت كام مره اتهنيت

مش هلقى شئ يتكتب وساعتها هتبخر لكن في يوم شدتك عمرى ما بتأخر يبقى بايدك اكتبيلي العمر وقدريه من الشوق اليكي جوه عينى السمر وذوقيني باي كلمة ان شالله حتى توصفيني بالحويط بس اوعی مره تقولی عنى في يوم عبيط انا اللي مهما بغيب بلاقي حضنك بيت ولاعمرى غشيتك اوحتى مليتك ده انا لما كنتى بتخنقيني بيكفيني شكل النيل

وريحه الخضرة في غيطك اديني اسم يكون على قد المحبة ادينى وصف يقربنى اليكي لكن متوصمنيش بعار ان صرت عار ازای هممیکی وازاى اصد البياعين وبدمى افديكي ايوه انا طفل محروم م الدلع لكنى جوايا رجيل و صلد ههد في فسادك وفوق ركامه هبنيكي مهما يحاولوا ينزلوكي انا وحدى اعليكي انا اللي حالف اني عمری ما اشقیکی

كتابين التاريخ

إيه يا بهيه ؟

سايبه اختك الغرب ياكلها!! مش هتقومى تثورى لحالها هتخليهم ينهوا جمالها ولا خلاص مبقتش قضية ايه يا بهية ؟

مش قولتيلنا انا ام الدنيا وحيطه صد لاى خسيس ناسيه وعودك ليه ما تردى ولا الامر فى ايد ابليس ايه يا بهية ؟ حطوا سفاره جوه القدس

عامله ودنك ليه من طين و انتخابتك كلها رقص ولا نسيتى مكانتك فين ايه يا بهية ؟

سايبه الدنيا بتضرب تقلب ولوحدك عايشه فى ملكوت والاوطان تايهه بتتغرب فوقى بقا فى شعوب بتموت

→ € 66 >>×

ایه یا بهیة ؟

مالك كده مش عارفه دورك واحوالك خلاص مش هيه والكلمه محشوره في زورك

ونسيتى الوحدة العربية

ایه یا بهیة ؟

الايام السوده بتطول

مش عارفین اخر من اول

وايه يلزم علشان نتغير

و لا دليلك اصبح احول

ایه یا بهیة ؟

ایه یا حبیبه خلاص عمیانه

مش خایف ان الدور ده یدور

طب مش حاسه انك قلقانه



ولا حاسه الدم اللى يفور الله يا بهية ؟
ليه بتلومى بس عليا ذنبى انى انا ولدك وبثور هتسيبى كرامتك مرميه انا مش عايزك توجعى قلبى ويحصل فيكى زى اخواتك في فلسطين وعراق وسوريا ايه يا بهية ؟

كتابين التاريخ

كلام الجدود

اسمع كلام الجدود حكيم كما المواويل دستور يخاطب العقول ويسندك ما تميل فى الطب ليهم طرق بتداوى الف عليل والصدق عنوانهم بيفيض كمان ويسيل الجد وقت الجد تحب تمشى معاه اوعاك تحيد عن كلامه

من فات قديمه تاه اسمع اليه واتعظ واسلك طريق وياه متقولش دقه قديمه داحنا امتدادهم بالحياه يا غاوى تترك تراثك وتعوم مع السايقه وبتنسى دايما توبك وعنيك ماهيش فايقه بكره تشوف مكتوبك بمكانه مش لايقه جدى وجدك كالدليل فی لیل بلا ملامح راسم خطوطك للمسير

كتابين التاريخ

لو يوم بقيت سارح لو مهما شوفته شدید بالخير يكون طارح مهما يطول الطريق مرساك على مطارح اخر وصيه للجدود ع الصخر محفوره ولا عمر يوم تتنسى فى اذهانا كالصوره ولا يوم يا جدى يعوضك مهما فرحت انا فیه ولا شئ يعوض لمتك ده الهمه مكسوره مش هنسي انا وصيتك

امشى فى سبيل الله واجبر خواطر العباد واسمى باسم الله اسمع كلام الجدود وامشى تملى بيه تبصر طريقك بالحياة فاحفظه وخليه واوعاك تحيد عنه لاحسن تتوه بعديه

اكتبيني

اکتبینی ع الحیطان حلم ضایع من سنین اکتبینی وجنب منی ارسمیلك دمعتین

قولى ثائر قام لبلدة بس مقدرش یکمل الطوفان كان موجه اعلى لكن بعمره قام يجمل قولى عمره ما وطى راسة او في يوم جه عليكي و قولى انه كان املك لما كلهم باعوكي ارسميني ع الحيطان واكتبى جنبى الشهيد اللي ضحى لجل عينك في يناير المجيد اكتبيني شاب حر واكتبى انى برئ

عمره ما اذيتك ولا اقدر وانى انا فى عشقك غريق قولی انی ضد دولا وانى ما اتجنيت عليهم وانهم باعوا في ارضك وانى برده وقفت ليهم وانى ما شاركتش فى زيف وان انا في حبك عفيف کل حلمی تکونی احسن بس انا خدتونی ضیف

قدام مقام سيدنا الولى

قدام مقام سيدنا الولى ك زى غابة من البشر لمحت ناس بالف شكل مرصوصين زى الشجر

كتابين التاريخ

الوان هدومهم الف لون اشباه رجال لكن حجر قدام مقام سيدنا الولي قابلت عيل كان عجوز الهيئه طفل اسمه على ايوه طفل لكن يجوز اليتم زاد من عمره عمر لكنه من معدن كنوز قدام مقام سيدنا الولى عيدان بخور وامساكية وناس تفرق قرصتين وناس تدور بمهلبية قدام مقام سيدنا الولى خيمة لطايفة من الصوفية

وحلقة للذكر الكريم وعيال تلف بتسقى مايه قدام مقام سيدنا الولى عربية مليانه بسبح وكف خمسه بوسطه عين وكام طاقية بمفتتح ايه من الذكر الحكيم قدام مقام سيدنا الولى عاشق لبيت الاوليا دوار لزين العابدين ولأم هاشم ستنا قدام مقام سيدنا الولى نداه بقولة المدد جاهل ماهوش عارف

كتابين التاريخ

يوجه الدعوه لمين الرب هو المعتمد مدد يارب الكون مدد قدام مقام سيدنا الولى برتاح لاهل البيت محبه من ريحة الصادق محمد القلب يرتاح حبه حبه قدام مقام سيدنا الولى فى وسط زحمتهم اروح اغسل همومى واستخبى

على الهامش

ركنتك بره ع الهامش وصيغتك ع الرفوف ذكرى وهسيبك بس تشوفيني وتتمنيني لو فكره زمان كنتيلى كل الناس لكن عدى خلاص زمنك لكن دلوقتى راح ابيعك و ابيعك والرخيص تمنك حاربت زمان وانا سندك ولجلك كنت حيط حاجز ودلوقتى انا هنسى

منا بعدك مانيش عاجز انا بعدك بقيت احسن ولقيت اللي يقدرني ولا هسمح في يوم ابدا اكون لحد يكسرني انا بعدك بقيت اقوى ولقيت الحضن والمؤى فعز الشدة يسندنى ووياه قلبى يستقوى مكانك هوع الهامش كما المسودة في كتابي سطورى مش لامثالك وفاكره انى ابقالك يدوبك دانتي تتسابي

ولا في افلاكي ليكي مدار قانون جاذبية الافلاك رماكى بره كالاعصار كنيزك ملقالوش مرتع فتاه فی مجره عنی و غار وع الهامش ده تكريمك كما عربية تتكهن مفیش لیها غیار تجدید ولا ابدا هتتصين ومفيش رجفات لنسيانك ولاحنيه للقاكي ولا نبضه وجع بتلوم ولا احساس كما المحروم طبيعى انى انساكى وتتركنى على الهامش

مسرحية

جاهزین جاهزین یا استاذ اضاءه جاهز تمام یا فنان بامتیاز صوت وطی البییت علّی الچاز دقیقتین و هنبداً 123 صوت کسر ازاز

\$\frac{83}

قيو بخلفيه عتمه كحل شيطان ماسك بأيد عكاز بعلو الصوت بينده فين اوسوس فين وحتى لمين ابالسه انتوا ؟! مشوفتش فيكوا بنى ادمين انا شيطانكم غلبتونى فى كل سبيل سبقتونى طب اعمل ایه انا تانی بافعالكم اهانتونى افتح نور مشهد تانى ایه یا شقیق ایه رفیق كيف الحال ؟! بخير يا صديق

*****(84)>>*

سلام باهت معادش في شكله اى بريق زمان كان السلام باحضان وكنا نعاتب الغلطان وكان منا الدفا فينا محدش کان پیات بردان شيمانا الحب والطيبه مكانش بينا في حرمان مشهد تالت زمام فالت كاميرا شمال سلط ضوء ارهابى بيقتل دماء سالت كاميرا يمين شرطى حزين ضرب اهله بطلق سلاح يلوم حاله انا الحامي وانا السفاح

عيون تايهه ايه الحاصل وایه الجاری فی الدنیا مين الغالب ومين مغلوب وطن بقا ملك ناس تانيه متاهه وكلنا مجذوب وضايع وسطنا المساكين عراه والفقر مزقهم وبيباتوا يا ناس جعانين وخشبه مسرح الدنيا هتفضل ثابته كما هيه واهى الادوار بتتغير عرایس بس مرمیه یدوب ده دور بیتبدل وكام سوكسيه لشخصية

كتابين التاريخ

والف ستار بینسدل
وحال الدنیا کما هی
والف کیو علشان تکمل
والف رویه محکیه
وده المسرح وده الجمهور
وکل الخلق بتمثل
ولا تذاکر و لا فی دور
ملامح دنیا بینا بس تتشکل
وهیه برده کما هیه
خشبه و ممثل و مسرحیة

تنهيدة

تنهيدة الوحشة طالعة بحشايا تئن وعشقى يابا وجع نار بالقليب بيون هبد بحيلي وصدني وصداع بعقلى يزن قتال يا شوق قتال بدلت بيا الحال وديت شبابي لويل وضاع وراه المال لجلك فؤادى انفطر ولیکی دمی سال

بردك ياليل مشتاق وانا والحبيب بفراق لكن عوايدك بقى تيجى بمرار واشواق واعتدت اناع القسوة تقدر تقول دواق حتى الغيطان ملّتنى والنيل كره قعدتى وانا والنحيب اصحاب وغصب عنى فرقتى راضى بنصيبى وقدر خایف تزید علتی ومشيت وقولت انسى ومرت الاعوام

وساعتها قولت نسيت واتدفنت الالام لحد ما اطمنت وقولت دیه او هام و من تائى كلمتنى صحت حنين اتوئد من بعدها متغرب وقلبى ليها افتقد طلبت سلاحى لوئدها في القلب قال حباه حنين اليها زاد ده انا قلبی بعدك تاه

____ كتابين التاريخ

عيون

عاشق جمال العيون مفتون بالوانهم العسلى تسحر كيانيوالسمره احسنهم والخضرا لون الربيع ...وورده ف البستان والزرقا زي الموج تخطفني قدامهم وحبيبتي ليها عيون بنيه برمادي بدأت كما الاعصار لكن مهوش عادى عصفت بكل العيون بقوا ليا كالابيض صارتلی کالدفه و بغیرها مش راضی قالوا العيون مرايات بتكشف المستور مين اللي بات عاشق ...ومين بات مكسور وجوه عينها لقيت جنه وبيت واولاد

طاقه محبه اتفتحت...وحضن زی قصور ومضیت بعینی جوه عینها عقد دایم اعیش معاها وجنبهاوبعشقها هایم واصبر معاها عالسنین واقوی بمحبتها وابقالها ضهر وسند...ولغیرها اکون صایم عشق العیون مختزل...لعیونك انتی وبس مش هتفتن بالوانبعنیکی بس هحس لا عسلی تسحرنی ولا خضرا تملکنی والزرقا منك تغیر علشان بحبك بس

الختام

واهى صورة فى البرواز شيلاني بملامحي ابان خفيف الدم ولونى انا قمحى شايل هموم البلد دى واموت فدا ارضها واحد من الملايين واسمى من اسمها عاشق بلاد النيل ولقبى منسوب لها شاعر بلاد النيل واصلی من جدرها

عشقى لبلدى تراث سايبه عشان ولدى وراسى ليها مداس ومانيش عدد فردى انا فيها بالالافات وعددنا ملهوش عد حطبها وقت النار وبارودها وقت الجد انا الف حاجه في بعض انا قصة تانيه وسط مخطوطه هواكي محتاجه بس السرد انا طينه معجونه بترابك مسقیه میة نیل

كتابين التاريخ

مبدوره بذرة محبة كارهه تشوفك ليل عشقانه ريحه المطر بنزوله كيف السيل ولما الغريب يعاديكي جنتنا تصبح ويل انا اللي مهما قسيتي بالعشق قلبي عليل وفخری انی اکون شاعر بلاد النيل

لامتى هيضيق البراح لامتى هنصد الرياح لامتى يبقى الذل فينا لشاب مكسور الجناح

تم بحمد الله ...

شاعر بلاد النيل شاعر النيل والفرات احمد حلمي

اهداء خاص

الى ابنى الحبيب عبد الله النتى الغالية جودي

هما اغلی من حیاتی ومن وجودی هما احلی نغمة طالعه بلحن عودی هما احلی غنوة تتقال من لسانی هما احلی اتنین هما عبد الله وجودی

محتوى الكتاب

2	بطاقة الكتاب
3	الشاعر في سطور
5	المقدمة
6	الإهداء
7	
10	البلكونة
	أنات
	كتابين التاريخ
	القديس
	نوبة
	صورة
29	
31	
35	
38	
40	
	مخدوع
45	
47	حكاية شاب
49	
	- *

51	 سكتنا
53	 المحراب
55	أنا من ولادك
58	 بلاد عيبة
50	اُتقى ربك
52	 الكنية ، العنوان ، السن
	ایه پابهیه
	كلام الجدود
	اكتبينى المستعادة
	بی صفح المستونا الولی مقام سیدنا الولی المستونا
30	على الهامش
	مسرحية
	تنهيده
	عيون
93	الختام
	 المداء خاص المداء خاص
	رمحتوى الكتاب
, O	 ······································